

JUDAS

Jmo₅ Judas si₂ ne₄ dsa₂ i₂ma₂quion'₅₄ quián₅ Diú₄

1 ¹ Jniá₂ Judas, líng₅ dsa₂ i₂jme₂ti₃ ne₄ Jesucristo, líng₅ rin'₅₄ Jacobo. Jmo₂₃ si₂ carta la₂ tsíng₂ ne₄ ca₂le₃jín₃ i₂té₄ i₂'nió₄ quián₅ Diú₄ Jmei₂ jniog₄, con'₂ i₂chan₂ lé₅ 'í₁ le₃quió'₅ Jesucristo. ² Jui₁le₂tsón₂ bá₄ ja₁con'₂ 'nia'₂ a₂ñéi₂ dsí₅ Diú₄, a₂'ei₅ tei₄, a₂'nió'₃ 'nia'₂ ríng'₂ né₃.

Dsa₂ i₂jme₂tag₅ juá'₅ jág₁ të₂jág₁

(2 Pedro 2:1-17)

³ 'Nia'₂ rin'₅₄ jniog₄ i₂'nió₃, lé₂ dsí₃ 'ñio₅ lin₃ a₂jmo₅₄ si₂ tsíng₅₄ ja₁con'₂ 'nia'₂ ja₁juá'₄ jui₁lia'₂ jág₁ a₂lión₂ dsa₂ a₂ma₂le₁ne₁ jniog₄. La₁ia₁, në₃ né₃, 'nió'₅ jmo₅₄ si₂ a₂chi₁leng'₄ 'nia'₂, a₂'nió'₅ quin'₅₄ 'nia'₂ bí₂ o₄quió'₄ jág₁ a₂'éin₂ jniog₄, jág₁ a₂ma₂dsia₃ Diú₄ o₄gú₃ dsa₂ i₂lé₅ 'í₁ quián₅.^a ⁴ Ia₁ ma₂ca₂i₃ton'₅₄ i₂lin₅₄ con'₂ të₃co'₅₄ jë₄ quián'₂ 'nia'₂, dsa₂ i₂ma₂ja₂lén₂ rë₂ín₄ ne₄ Si₂ ca₃ma₂líg'₂ i₂ma₂tion'₅₄ jui₅ dsí₃ 'én₂. Lín₅ dsa₂ i₂tsá₃ Diú₄ cuín₅, i₂'nio₃ jme₃tsín₃ jág₁ a₂'ua₁ dsí₅ Diú₄ quián₂ jniog₄ con'₂ tsá₃ o₁jau₅₄ jui₅ a₂tóin₃ jmo₃-dsáu₅ a₂'lig'₅₄ a₂ja₂ dsí₅; tsá₃ tioen₂₃ a₂lín₅ Jesucristo i₂jan₂ tan₅₄ juig₅₄ jniog₄ Te₁gui'₅₄ quián₂.

⁵ Jui₁la₂ ma₂le₁ñi'₅₄ 'nia'₂, la₁ 'nio₃ jniá₂ juá'₄ táng₃ ia₁jaun₂ dsiog'₂ 'au'₂, ia₁ lia'₂ con'₂ jme₁ca₂'uín'₂ Te₁gui'₅₄^b dsa₂ juig₂ Israel ma₂líg'₂ lia'₂ con'₂ jme₁tioin'₅₄ 'uë₃ Egipto, la₁ ca₂jme₃dsiain₂₃ bá₄ i₂lin₅₄ dsa₂ 'éi₂ ia₁ tsá₃ ca₂'éin₃. ⁶ Le₂jaun₂ bá₄ táng₃ quian'₅₄ ángeles i₂tsá₃ 'í₁ ca₂lí₃ ta₁ a₂jme₁lín₄, të₂le₃ ca₂tí₂ bá₄ ja₁jme₁tiáin'₄. 'Éi₂ né₃ rë₂né₃ tioen'₅₄ le₁jñí₅ jë₄ qui₁né₃, ja₁ma₂le₁'ñei'₅₄ co₂tan₅₄ quian'₅₄ ñí₁ cadenas, lé₅ 'í₁ quió'₅ Jmig₄ Juë'₂ jaun₂. ⁷ Le₂në₅ bá₄ ján₃ jui₁lia'₂ ca₂jmo₃ dsa₂ i₂jme₁chan₂ juig₂ Sodoma quian'₅₄ Gomorra*, ca₂le₃jé₃ gué₄ juig₂ i₂jén₂ ma₂quián₅ jaun₂, ca₂jín'₂ qui₂ca₂nió'₃ ca₂le₃jé₃ ne₅₄ jág₁ 'lig'₅₄, qui₂i₃lén₂ chi₁co'₅₄ quió'₅ a₂ín₅ dsí₅ ni₁ñi₁ i₂sián'₂ a₂tsá₃ dsi₂ten₅₄ jmo₃. Uig₅ a₂ñág₅ jë₄ si₂ a₂jioig₅ co₂tan₅₄ a₂ca₂gue₃ jaun₂, 'é₂ jág₁ ja₁con₂ dsa₂ i₂chan₂ jmig₄ në₃.

⁸ Le₂në₅ bá₄ ján₃, të₂le₃ quian'₅₄ 'e₂ a₂niog₅ qui₅ dsa₂ 'éi₂, qui₂jme₂'ióg₃ ni₁ñi₁ guioin₅₄ quian'₅₄ dso₄ a₂qui₂'no₂₃, tsá₃ ji'₅₄ 'éi'₃, 'lig'₅₄ bá₄ táun₂ le₃quió'₅ i₂jlán'₁ chan₂ quián₅ Diú₄. ⁹ Ia₁ ca₂lia'₂ jñia'₅₄ ángel Mi₂gue₅₄ i₂lín₅ i₂dsen₅₄ gué₄ quián₅ Diú₄, lia'₂ con'₂ jme₂ca₂tsín₂ quian'₅₄ i₂së₃dsen₃ ne₄ o₄quió'₄ ni₁ñi₁ 'lag₄ Moisés, tsá₃ ca₂tiá₂ dsí₅ 'éi₂ jua'₅₄ 'ag₃ 'lig'₅₄ a₂'nag₃, të₂le₃ ca₂juá'₂: “Te₁gui'₅₄ bá₄ jui₁qui₂dsi₅ 'éi'₃ ja₁cong'₂.”

^a3 lit. “dsa₂ jnió₅.”^b5 A₂lin₅₄ chog₅₄ si₂ a₂gui'₅₄ gué₄: “Jesús.”

¹⁰ La₁ dsa₂ 'éi₂ né₃ 'ë₂₃ 'lig'₅₄ 'e₂ caun₂ a₂lé₂, tē₃ tsá₃ ma₂ñi₅ rē₂; jmo₂₃-dsáu₅ lia'₂ ja₁jmo₅ já'₂ náu₂ i₂tsá₃ 'e₂ ñí'₂ dsí₅, ia₁ jui₁lia'₂ a₂cuí'₅ con'₂ lé₅ a₂ñí'₂ dsí₅ guioin₅₄ a₂cha₂ mi₂güí₃ la₂, quian'₅₄ a₂jaun₂ bá₄ dsi₃'éin₂.

¹¹ 'I'E₂ gué₄ juí₂ dsa₂ 'éi₂! Ia₁ ma₂ja₂léin₂ quian₅ jui₅ quió'₅ Caín; ne₄ 'uig₅₄ ia₁ a₂dsi'₅₄ cu₄ bá₄ ca₂i₁nioi₁₂ tē₂le₃ dséi₂, 'ein₂₃ jui₅ ja₁tsá₃ dsau₅ a₂ca₂can₃ Bala'am. La₁ ca₂i₃'éin₂ jui₁lia'₂ ca₂i₃'én₂ Coré^c jme₁ca₂nau₂ quein₅. ¹² Co₂'nió'₄ caun₂ 'mé'₅ a₂quian₅ o₂guí'₃ bá₄ a₂jmo₅-dsáu₅ dsa₂ 'éi₂ jin'₄ 'nia'₂ jme₁tóng'₅ qué'₂ jmo'₂ 'nia'₂ jmig₄ a₂'nióg'₃ ríng'₂. La₁ dsa₂ 'éi₂ quein'₅₄ jin'₄ 'nia'₂ qui₂gué'₅ qui₂'ín'₂ 'io'₂ jén'₅ ca₂lia'₂ tsá₃ 'e₂ gó'₃ jmo₂₃. Lín₅ jui₁lia'₂ jan₂ dsa₂ i₂jmo₅ 'í₁ já'₂ cha'₂, la₁ jñia'₅₄ con'₂ dse₃ jme₂tain₅₄ guioin₅₄ bá₄. Lín₅ jui₁lia'₂ lé₅ jnei₅ a₂lē₁qui₂ñag₅ quian'₅₄ dsí₂ tsá₃ 'e₂ jmí₅ cha₂ gué'₂; o₃ lín₅ táng₃ jui₁lia'₂ ni₁'ma₂ a₂lē₁le₁dsi₅₄ tó'₅ lí₁ jein₂ quió'₅, la₁ tsá₃ 'e₂ mí₂g₂ cha₂ gué'₂ jaun₂ né₃. Lín₅ co₂'nió'₄ ni₁'ma₂ a₂ma₂ca₂cang₅ le₂jio₅ jmú₄, le₃jua'₅₄ a₂ma₂quian₅ tin₃ ne₅₄ 'mú₃. ¹³ Lín₅ jui₁lia'₂ lé₅ jmig₂ a₂lē₁qui₂ñá'₅ tiá₂ ne₄ jmi₁ñí'₄ a₂ráun₂ quian'₅₄ dsí₂, qui₂le₁'ág₄ ne₄ jan₅ ca₂le₃jé₃ a₂lē₁'iog₅ o₂guí'₃ quió'₅. Tioin'₅₄ jui₅ i₂nioi₅₄ lín₅ jui₁lia'₂ lé₅ nei₅ a₂lē₁ma₂i₂nio₄, tsá₃ ma₃jui₅ co₂dsau₅ le₁quian₅. Ma₂tioin'₅₄ jui₅ a₂dsi₁lein₃ jē₄ qui₁né'₃ 'ñio₅ lin₃, ja₁ma₂lé₅ co₂jñia₅₄ ja₁dsi₁toin'₄ co₂tan₅₄.

¹⁴ Le₂jaun₂ bá₄ Enoc ján₃, dsa₂ i₂jē₁ca₂tē₂ jñé₂ tsi₁jon₂ Adán i₂ca₂rē₃chán₃; 'éi₂ ca₂'é₂ jág₁ tē₃jñiá₅ ca₂'iin₃ dsa₂ le₂'éi₂ jme₁ca₂juá'₂: “Ca₂jñg₅₄ Te₁gui'₅₄ jóin'₅ ca₂sióin₃ quian'₅₄ tē₂le₃ mei₅ bá₄ i₂jñiós quiáin₅, ¹⁵ a₂qui₃dsi₂₃ 'éi'₃ ne₄ quió'₅ ca₂le₃jín₃, a₂'liain'₃ ca₂le₃jín₃ dsa₂ 'lín'₅₄, ne₄ 'uig₅₄ ca₂le₃jé₃ ne₅₄ a₂'lig'₅₄ a₂qui₂ma₂jmo₃, ne₄ ca₂le₃jé₃ jág₁ lē₁'iog₅ a₂qui₂ma₂'iin₃ Diú₄ né₃.” ¹⁶ Dsa₂ le₂'éi₂ né₃ ca₂le₃jé₃ bá₄ 'i₄ dsí₅ jmo₂₃, qui₂'no'₂ dsáu₁ dsa₂, jmá'₃ lia'₂ jui₅ ja₁le₃chain₂ dse₃ ja₁mag'₂ dsí₅ guioin₅₄ bá₄ 'no'₂. Tiin₂ dsia₃ jmá'₃ lia'₂ jág₁ tá'₅, ton'₂ 'ñioi₅₄ 'a₂ lia'₂ jme₃'uáin₂ dsí₅ dsa₂ ia₁jaun₂ lí'₂ 'e₂ a₂'nio₃.

'É₂ gué₄ jág₁ tē₃jñiá₅ tsí'₅ dsa₂ 'én₂

¹⁷ La₁ 'nia'₂ né₃ rin'₅₄ jniog₄, jui₁dsiog'₂ 'au'₂ 'nia'₂, ca₂le₃jé₃ jág₁ a₂ma₂cué₃ dsa₂ i₂chen₄* quián₅ Te₁gui'₅₄ Jesucristo quián₂ jniog₄, ¹⁸ ca₂juá'₂ ca₂tsí'₃ 'nia'₂: “Jmí₄ jē₁ca₂tó'₂ le₃chan₂ dsa₂ i₂jñia'₅₄ lē₁qui₃táun₂ 'lig'₅₄, a₂le₃chain₂ tiain'₃ con'₂ lé₅ mi₅ dsí₅ guioin₅₄, ia₁ tsá₃ Diú₄ cuiin₂₃.” ¹⁹ Dsa₂ le₂'éi₂ bá₄ i₂jmo₃ le₁dson'₅₄ 'nia'₂; i₂nioi₅₄ con'₂ dsi₂jio₅ dsí₅ guioin₅₄, tsá₃ Jme₂dsí₂ quián₅ Diú₄ quian'₅₄.

²⁰ La₁ 'nia'₂ né₃ rin'₅₄ jniog₄, caun₂ jui₁dsi₂cón'₃ bá₄ 'nia'₂ quian'₅₄ a₂'éng'₂ a₂lé₅ a₂jñiós gué₄ lin₃. Chi₁len'₅₄ 'nia'₂ Diú₄ con'₂ lé₅ jio₅ Jme₂dsí₂ Jñiós. ²¹ Jui₁chan'₂ bá₄ 'nia'₂ lé₅ 'í₁ ja₁'nio₃ Diú₄ 'nia'₂; qui₂le₁jan'₄ a₂dsia₃ néi₂ dsí₅ Te₁gui'₅₄ Jesucristo quián₂, ca₂lia'₂ ca₂tē₂ jmí₄ i₁cué₃ ja₁le₃chan'₂ 'nia'₂ co₂tan₅₄.

^c11 Core: 'Í₂ Números 16.

²² Dsia₄ 'nia'₂ ηéi₂ 'au'₂ ja₁con₂ jui₁lia'₂ dsa₂ i₂qui₂le₁'ág₄ caun₂-tin₃
dsí₅, ²³ lion₅₄ 'nia'₂ i₂lin₅₄ në₂jag₄ bá₄ a₂'uün'₅₄ jë₄ si₂. Dsia₄ 'nia'₂ ηéi₂
'au'₂ ja₁con₂ i₂sián'₂, të₃ gang'₃, të₃ 'ηiag'₅₄ ca₂le₂jiog₅ ni₁tsin'₅₄ a₂rë₂'ióg₄
quian'₅₄ ni₁ηi₁₂.

Jág₁ a₂rë₂juin'₂ Diú₄ jë₁ca₂tó'₂

²⁴ Në₃ në₃, të₂le₃ quió'₅ i₂qui'₅₄ jmig₄ jmo₃ 'í₁ 'nia'₂ ia₁jaun₂ tsá₃
tsi₃séng'₂, jme₃jniai₂₃ 'nia'₂ ján₃, ja₁jlá'₁ lin₃ ja₁guá₄ Diú₄ a₂tsá₃ ma₂'e₂
dso₄ rë₂cáng'₄, ja₁jiá₃ 'au'₂ 'nia'₂ 'io'₂ jén'₂ gué₄ lin₃, ²⁵ le₃quió'₅ Diú₄
i₂jan₂ tan₅₄ [i₂ηí'₂ dsí₅]^d i₂lió₂ jniog₄, i'úi₂ bá₄ i₂ca₂tín₂ ca₂le₃jé₃ ti₁'mag'₄,
ca₂le₃jé₃ a₂jme₂juag'₂ dsa₂, ca₂le₃jé₃ gué₄ jui₅bí₂, ca₂le₃jé₃ 'úi'₃ në₃, [të₂le₃
quian'₅₄ Jesucristo Te₁gui'₅₄ quián₂ jniog₄],^e ca₂le₃jé₃ jmig₄ ja₁ma₂já₅,
jmig₄ rë₂në₃, lia'₂ co₂tan₅₄ në₃! iA₂méi₃*!
Co₂në₅.

^d25 Chog₅₄ si₂ a₂dse₃ gué₄ tsá₃ le₁ton₅ jág₁ në₅.

^e25 A₂lin₅₄ chog₅₄ si₂ tsá₃ le₁ton₅ jág₁ në₅.